

中國方志叢書·華北地方·第二七〇號

據清·光緒五年刊本  
清·余修鳳等纂修  
影印

陝西 省

定遠廳志 (一)

成文出版社有限公司印行

中國方志叢書·華北地方·第二七〇號

據

清·光緒五年刊本  
清·余修鳳等纂修  
影印

陝西 省

定遠廳志  
(二)

成文出版社有限公司印行

中華民國五十八年 月壹一版

# 定遠廳志

全二冊

發行人：黃 成 助

台北郵政信箱二二六〇五號  
出版者：成文出版社有限公司

台北郵政信箱二二六〇五號  
台北市羅斯福路三段279之二號  
電話：三三七〇一三三二號

印刷者：東南印製廠有限公司  
和平西路二段70巷83弄29號

內政部登記證內版台業字第一一四七號

創修定遠廳志序

丁丑秋

修鳳

捧檄蒞定遠任初下車卽調取志乘闕如也蓋地

處偏隅設廳日淺是以文獻無徵雖然文獻可待而民情難緩  
不有志乘何以爲治於是隨時諮訪遇事勤求迄今三載粗得  
體要乃設局選紳分司其事有疑難者則旁徵典籍互參眾論  
間或斷以己意由是始有成焉夫志者記一邑之事也不日記  
而曰志豈非以其事可通於 國史上考天時下載地利中辨  
人事殆將以備

朝廷採取而爲 國史之資乎 國史之志地理也山川則脉  
絡分明疆域則界限無越其志建置也城池必防守盡善公署

亦相度得宜而其志人物官師也又必善惡備錄仕隱毋遺推  
 之食貨賦役凡有關於國計民生者靡不詳論得失具載源流  
 蓋將以寓懲勸昭法戒焉夫豈炫異示博漫無關係即可稱一  
 代良史哉修鳳不敏竊嘗本此義以自勵然而難言之矣其或  
 採訪不實則議論多乖好惡不公則賢否易混見聞不廣亦彰  
 闕難明修鳳技鮮三長值此僻遠多故乃欲空所倚傍獨闢洪  
 荒成此一方文獻也豈不難哉且定本巖置幅幘遼濶其間山  
 川形勢道路險夷以及津梁關隘尤宜切實詳明而窮山邃谷  
 足跡未遍慮難周知適同里趙禎隆遊戎來訪趙君蓋嘗從余  
 馳驅邊徼有年雅工繪事卽倩其周歷方隅繪圖貼說燦若列

眉可謂具千里於尺幅中矣茲幸全橐粗成復緝閱數四覺分門別類原委井然庶或不失古人易記名志之義而爲後來者導夫先路耶今而後吾知廳人士睹是書者忠孝節義必皆有所感激而天性不少漓也學問經濟必皆知所擴充而人功不少懈也訟獄由是而衰息風俗由是而敦龐誠盛事也此吾之所重望也若充類以盡其餘則有俟夫博雅者謹序光緒五年歲在己卯菊秋朔

覃授通奉大夫

誥授朝議大夫

賞戴花翎

欽加知府銜陝西定遠廳同知楚南平江余修鳳撰

定遠廳志例言

志者史之一體周官小史掌邦國之志今國史一統志是也  
外史掌四方之志今直省通志及府廳州縣志是也定遠原屬  
西鄉縣自

國朝嘉慶七年建設廳治迄今七十餘年凡所設施亟應編輯  
爰倣李氏元度平江志義例恭錄

詔諭於卷首別爲總目十有三曰地理曰建置曰賦役曰食貨  
曰學校曰祀典曰禮儀曰職官曰武備曰選舉曰人物曰五行  
曰藝文并仿康氏海武功志例以山川城池之屬併入地理官  
署市集之屬併入建置祠廟寺觀之屬併入祀典以綱統目以

簡御煩計爲類十有三爲卷二十有六總二十餘萬言別爲序  
次如左云

郡縣有志猶列國之有史例皆恭錄

聖諭於簡首凡所叙述皆上對

朝廷下對天下萬世而言故大吏一律書名宋潛氏說文臨安  
志亦首載

詔令若我

國家

列聖相承絲綸炳煥凡命官訓士恤民及表章節義普免天下

錢漕諸

諭旨雖非一邑所專承而大經大法尤足與典誥並壽故恭錄  
弁首俾讀者油然生忠愛之心焉

郡縣志地理地理志之本也志地理者首重輿圖其次則沿革  
今師顧氏計里開方胡氏虛空鳥道之法繪總圖一四鄉圖各  
一城圖一衙署學宮壇廟諸圖六其歷代沿革離析合併之由  
則列表以明至於疆域廣狹山川方向皆隨其脈絡遠近而條  
貫之其關隘寨堡尤爲邊防緊要關鍵具載應詳卽故城故亭  
以及殘壘廢冢亦不可畧蓋旣藉古蹟資考鏡而末附以風俗  
苗俗則又驗政治之得失也凡此各目皆併隸地理門作地理  
志第一

郡縣有建置猶古籍中三輔黃圖宮殿疏禁扁諸書之遺意也  
故春秋之例興作必書今廳治工作或請帑建修或官吏捐俸  
或紳民醵貲自應縷晰備載若武功志併學校於建置謂學校  
特建置中大端在記興修歲月而於一切典章不暇記也茲學校  
自爲志壇廟列入祀典門特著其切於官民日用者凡五端曰  
城池曰公署曰公所曰橋渡曰坊表合爲建置志第二

有田則有賦有身則有役卽後世官書專紀田賦者之所自也  
國朝順治十四年頒賦役全書量賦之多寡定役之繁簡康熙  
五十二年

詔滋生人丁永不加賦雍正初令丁隨地徵有賦者始有役乾

隆二十七年乃併停編審民尤稱便至

聖祖

高宗朝普免天下錢漕十次蠲豁者不可以億計尤曠古未有之殊典也茲條其子曰田畝曰科糧曰解支而殿以蠲卹總爲賦役志第三

史家志食貨肇自班氏晉魏隋唐以下皆因之地志家亦沿其例至積貯爲生民大命則有常平義社倉諸法凡皆本周官倉人遺人春頒秋歛之法而增損之耳故條舉物產倉儲之數以備稽考作食貨志第四

學校爲風教所關尤當詳稽儀制俾學者入廟思敬以時習禮

於以陶化樸僿臻明備之休自武功志隸學校於建置謝氏啓  
昆廣西通志因之且謂樂品禮節皆會典舊章率土通行非粵  
西獨舉之典而以舊志備載爲非體夫會典通禮豈能家有其  
書賴志乘可稽藉資法守耳若畧所不當畧將事者於何取則  
焉歐陽公曰自漢以來史官所紀事物名數降登揖讓拜俯伏  
與之節用之郊廟朝廷自縉紳大夫從事其間者皆莫能曉習  
而天下之人至於老死未嘗見也况定遠山陬僻處地瘠民貧  
典籍缺如幾不知禮樂爲何事是用詳稽會典凡典禮位次牲  
幣器數樂章之屬悉綴於篇而以學額書籍教條學田及書院  
義學考棚附焉作學校志第五

治民者先其神今考論祀典自孔子廟別見學校外凡社稷壇  
壝及諸祠祀以次備及若夫鄉聚叢祠浮屠老子之宮律以陸  
氏靈壽志之例法當屏汰顧以民誠所寄難概從芟故附見之  
亦過而存之之義也作祀典志第六

范蔚宗易班氏禮樂志爲禮儀志隋書因之記曰安上治民莫  
善於禮蓋時王之制尤當率履弗越也伏讀

大清會典通禮通典諸書萃周官儀禮之精損益百王之法實  
足以廣教化而美風俗也惜山郡偏隅不能家置一編甚有終  
身未獲見者茲檢官民通行公典及祭禮昏禮喪禮之類具著  
於簡俾良有司與邦之士民習乎其事而喻乎其志庶無失遵

道遵路之義作禮儀志第七

百官志出自漢書而唐人廳壁記具書職官姓名占籍任年以掌故所繫不容畧耳考靈壽志例名宦卽於職官中臚列事實不立專門定遠分設日淺今於鄉民已經立祀者特爲叙述其餘政績卓卓可紀者亦附著焉又定實爲漢班超封邑相沿至今豈宜數典而忘祖故特書之以冠職官之首作職官志第八定當蜀鄂之衝爲行省西南門戶歷代營制無從稽考自嘉慶初教匪滋事以定爲巢穴蔓延鄂蜀秦隴漢南騷動經畧額侯督師勦辦駐軍廳境東馳西擊數載於茲掃穴擒渠卒平寇亂旋籌議三省邊防營制始備今條列營汛而以團練兵事附之

作武備志第九

選舉志肇自唐書宋馬端臨作選舉考謂後世以科目爲取士之途銓選爲舉官之途是科目與銓選不相爲謀進身之途輒不一故立舉士舉官兩門以該之今志舉士曰進士曰舉人曰貢生舉官曰薦辟曰仕宦曰武職而附以職銜封蔭凡附著者律以史例多應從芟然考韓邦靖朝邑志於人物門列其父與兄弟科目事實并及已之仕履武功志載以例入監者二十五人掾史入官者十二人并及武功封贈彼號稱簡貴者尙爾詎不可援爲例乎作選舉志第十

地志爲史氏之流別史有列傳方志亦師其意而人物具紀焉

唐書藝文有江敞陳留人物志陽休之幽州人物志隋書有吳陽勝桂陽先賢畫贊定雖山陬僻壤然十室之邑必有忠信若不細加採擇何以勵清操而維風化茲勤加採訪嚴覈見聞以類相次曰忠節曰孝行曰善行曰耆壽至貞烈節孝壽婦概以列女賅之作人物志第十一

五行志創自班氏厯史因之馬氏通考乃總災祥二事而名之曰物異鄭氏通志紀災祥不紀徵應蓋其慎也定遠無志可稽而漢中西鄉舊志均列災祥去之則事實無徵歸併則無門可隸考靈壽志亦紀災祥且謂感應之理不可廢也故謹書之而仍用班史之目作五行志第十二